

Ningun Wesu T'ei!

E selebrashon di mas importante di aña ta nèt nos dilanti, e dianan ku nos ta kòrda no solamente ku Hesus a muri, ma ku El a resusitá tambe. Mas ku tur otro kos, e konmemorashon aki ta hasi siñansa di Beibel úniko kompará ku otro kerensia. Otro religion por tin un siñadó dinámiko, étika moral, un lider ehemplar. Ma **solamente e fe kristian ta basá riba un lider resusitá!** Solamente graf di Hesus ta bashí!

Algun hende ta chercha resurekshon di Hesus, tumando e evento komo un fábulá, manera Kompa Nanzi òf San Nikolas. Ma si bo, ku un mente imparcial, ta studia e evidensia pa e resurekshon di Kristo lo bo keda impreshoná ku e pruebanan na favor di e evento milagroso aki.

Pensa un ratu di un simpel echu: Hesus Su graf tabata bashí. Riba su mes, esei no ta proba ku Hesus a resusitá. Ma mester tin un splikashon dikun e graf tabata bashí. Ken lo a saka kurpa di Hesus? Tin dos alternativa: òf ta hende a saka Su kurpa, òf Dios a sak'é—resusit'E.

Si ta hende a saka kurpa di Hesus, ken lo a hasi'é? Sigur no tabata Su enemigunan. Nan tabata tan desididu pa Su kurpa **keda** den graf ku nan asta a stashoná soldá ei pa prevení hende di saka Su kurpa. Tabata na nan bentaha pa e kurpa keda den graf, pa proba ku E no a resusitá manera El a profetisá.

Por tabata amigunan di Hesus ku a saka Su kurpa fo'i graf? E pusibilidat ei tampoko ta faktíbel. E apòstelnan lo no a hòrta kurpa di Hesus pa dos motibu prinsipal. (1) E apòstelnan mes tabata skonde, morto spantá. Asta ora e muhénan a anunsiá ku Hesus a resusitá, nan tabata floho pa kere nan. Dos apòstel so tabatin kurashi pa bai graf i wak. Ademas (2) e apòstelnan lo no por a saka e kurpa. E guardianan sin duda a kumpli ku nan deber na e graf mes fiel ku nan a kumpli ku nan tarea pa arestá Hesus. Tabatin sufisiente soldá i arma pa protehá e graf.

Si amigunan di Hesus no a saka Su kurpa for di graf, ni tampoko Su enemigunan, **esei ta laga solamente un otro opshon: El a resusitá!**

Kòrda tambe ku **Herusalèm** ta unda e apòstelnan a kuminsá prediká ku Hesus a resusitá. Esei ta presis unda Hesus tabata derá. Si nan predikashi tabata falsu, enemigunan di Hesus fásilmente lo por a proba esei: habri graf i mustra mundu ku Su kurpa t'ei ainda. Sin duda nan a deseá pa hasi esei. Ma tabatin un problema; ningun wesu di Hesus tabat'ei. Si nan por a lokalísá Su kurpa, nan lo a bai busk'é. Si resurekshon di Hesus tabata mentira, lo tabata muchu mas fásil pa gaña hende si e apòstelnan a bai na otro pais i prediká di Su resurekshon. Ma nan a prediká esei nèt na e lugá mas peligroso: Herusalèm! Ma echu ta ku tur hende por a mira ku graf di Hesus tabata bashí!

E resurekshon ta krusial pa nos fe. Hesus a profetisá ku E lo resusitá. Si E no a resusitá, Su deklarashon tabata falsu. Nos lo mester konkluí ku Hesus tabata òf un loko ku a papia ko'i kèns òf un gañadó kampion. Si un di e dos alternativanan ei ta bèrdat, Hesus no por salba ningun hende. Pero si Hesu-Kristo a resusitá, anto E ta presis ken El a bisa ku E ta (Dios mes!) i nos por konfia Su deklarashonnan. Hesus a bisa:

- E so por salba: “Ami ta e kaminda, i e bèrdat, i e bida; ni un hende no ta bin serka e Tata, sino pa medio di Mí” (Juan 14:6).
- Hende mester bira di nan piká pa haña salbashon: “..si boso no repentí, boso tur lo peresé..” (Lukas 13:5).
- Hende mester stòp di konfia nan obranan, religion, moralidat pa salba nan i konfia Hesu-Kristo so: “Esun ku kere den e Yu tin bida etèrno; ma esun ku no obedesé e Yu lo no mira bida, ma e furia di Dios lo keda riba dje” (Juan 3:36)

E dianan ku ta nèt nos dilanti ta e selebrashon di mas importante di aña. Bo por konfia Kristo Su delarashonnan i aseptá Su oferta di salbashon, pasobra El a muri i resusitá...ningun wesu t'ei!